

Teaghlach i mbaol

Ceist 1 Beidh tú ag féachaint ar ball ar thuairisc faoi theaghlach atá faoi bhagairt i gCathair Luimnigh. Sula bhféachann tú ar an tuairisc pléigh na ceisteanna seo leis an duine in aice leat nó le do ghrúpa:

- An raibh tú riamh i gCathair Luimnigh? Cad é do bharúil faoin chathair sin?
- Cén fáth a mbíonn Luimneach sa nuacht go minic?
- Ar cheart go mbeadh cead ag na Gardaí gunnaí a bheith acu?

Ceist 2 Anois féach ar an tuairisc cúpla uair agus déan iarracht an leagan Gaelige de na focail seo thíos a aimsiú inti. Ansin cuir do chuid freagraí i gcomparáid le cinn an duine in aice leat.

An bhfuil mórán díobh ar eolas agat sula bhféachann tú ar an tuairisc?

- | | |
|-----------------------------|-------|
| 1. Minister for Justice | _____ |
| 2. it's confirmed | _____ |
| 3. who had to ... | _____ |
| 4. relocate | _____ |
| 5. abroad | _____ |
| 6. criminal gangs | _____ |
| 7. courageous | _____ |
| 8. his cousin was shot | _____ |
| 9. most powerful | _____ |
| 10. members of Wayne's gang | _____ |
| 11. intolerable | _____ |
| 12. implemented | _____ |

Ceist 3 Anois féach ar an tuairisc arís agus scríobh síos achoimre uirthi. Léigh amach an méid a scríobh tú don duine in aice leat.

Ceist 4 A. Féach ar na samplaí seo thíos den mhodh ordaitheach. An féidir leat féin agus an duine in aice leat na rialacha éagsúla a bhaineann leis a dhéanamh amach? Féachaigí ar an chló trom chun cuidiú libh.

Tóg d' am.	Tógaigí bhur n -am.
Ceanna igh ceann domsa.	Ceanna igí ceann domsa.
Éirigh!	Éirígí!
Bí ciúin	Bígí ciúin
Ná bris aon rud.	Ná bris igí aon rud
Ná habair sin	Ná habra igí sin

B. Iarr ar an duine in aice leat anois cúpla gar a dhéanamh duit. Bain úsáid as na briathra a bhí sa mhír:

tabhair / deir / diúltaigh / seas / cuir

C. Conas a d'iarrfá ar do mhúinteoir rud éigin a dhéanamh duit?

Ceist 5

A. Labhair leis an duine in aice leat faoi na rialacha a bhaineann leis an aimsir fháistineach. Bainigí úsáid as na briathra seo chun na rialacha a mhíniú.

Buail
Ól
Ceannaigh
Imir

B. Cad faoi na briathra mírialta?

C. Athscríobh na habairtí seo ón mhír san aimsir fháistineach:

- Thug an stát gach cúnamh do theaghlach Steve Collins.
- Dúirt an tAire Slatter go raibh tacaíocht iomlán ón stát tuillte acu mar gheall ar chomh cróga is a bhí siad.
- Thug gaol le Roy Collins fianaise don chúirt.
- Cuireadh go príosún é ar feadh seacht mbliana.

Ceist 6

‘...Cathair Luimnigh...’

Bí ag obair leis an duine in aice leat agus breacaigí síos príomhchathracha na tíre.

Treoracha agus Freagraí

Ceist 1

Tá an plé seo le déanamh sula seinntear an tuairisc.

Ceist 2

Is féidir iarraidh ar na mic léinn triail a bhaint as na focail ar dtús sula bhfeiceann siad an tuairisc agus ansin arís agus an tuairisc ar siúl.

1. Minister for Justice	<i>An tAire Dlí agus Cirt</i>
2. it's confirmed	<i>tá sé dearbhaithe</i>
3. who had to	<i>arbh éigean dó</i>
4. relocate	<i>athlonnú</i>
5. abroad	<i>thar lear</i>
6. criminal gangs	<i>buíonta coiriúlachta</i>
7. courageous	<i>cróga</i>
8. his cousin was shot	<i>lámhachadh a chol ceathrair</i>
9. most powerful	<i>is cumhachtaí</i>
10. members of Wayne's gang	<i>baill de bhuíon Wayne</i>
11. intolerable	<i>dofhulaingthe</i>
12. implemented	<i>curtha i gcrích</i>

Ceist 3

Tabhair tamall do gach foghlaimeoir achoimre ghairid a scríobh agus ansin iarr ar gach beirt na hachoirí a léamh dá chéile.

Ceist 4

A. An modh ordaitheach:

- Sa mhodh ordaitheach uatha baintear úsáid as fréamh an bhriathair.
- Sa mhodh ordaitheach iolra cuirtear na deirí seo leis an bhriathar:
An chéad réimniú, leathan – aigí
An chéad réimniú, caol – ígí
An dara réimniú, leathan – aigí
An dara réimniú, caol – ígí
- Sa mhodh ordaitheach, cuirtear **Ná** roimh an bhriathar chun an fhoirm dhiúltach a chumadh. Cuirtear **h** ar ghutaí a thagann i ndiaidh **Ná**.
- Ná déan dearmad an aidiacht shealbhach ceart a úsáid san uatha agus san iolra: Tóg **d'**am. Tógaigí **bhur n**-am.

Cuir na foirmeacha de na briathra mírialta ar a súile dóibh más gá:

Tar	Tagaigí	Téigh	Téigí
Feic	Feicigí	Abair	Abraigí
Déan	Déanaigí	Beir	Beirigí
Faigh	Faighigí	Tabhair	Tugaigí
Ith	Ithigí		

B. Cleachtadh cainte atá i gceist anseo.

C. Uaireanta baintear úsáid as an mhodh coinníollach, seachas an modh ordaitheach, le béasa a chur in iúl. Mar shampla:

1. Ar mhiste leat an doras a dhúnadh?
2. An bhféadfá an doras a dhúnadh?
3. An ndúnfá an doras, le do thoil?

Ceist 5

A.BUAIL

An mbuailfidh tú liom amárach? Buailfidh. / Ní bhuailfidh.

buailfidh mé	buailfimid
buailfidh tú	buailfidh sibh
buailfidh sé/sí	buailfidh siad

ÓL

An ólfaidh sí deoch leat? Ólfaidh. / Ní ólfaidh.

ólfaidh mé	ólfaimid
ólfaidh tú	ólfaidh sibh
ólfaidh sé/sí	ólfaidh siad

An dara réimniú

CEANNAIGH

An gceannóidh tú an páipéar dom? Ceannóidh. / Ní cheannóidh.

ceannóidh mé	ceannóimid
ceannóidh tú	ceannóidh sibh
ceannóidh sé/sí	ceannóidh siad

IMIR

An imreoidh sibh cluiche *cardaí* liom? Imreoidh / Ní imreoidh

imreoidh mé	imreoidimid
imreoidh tú	imreoidh sibh
imreoidh sé/sí	imreoidh siad

B. Na Briathra Mírialta san Aimsir Fháistineach:

<p>ABAIR déarfaidh mé déarfaidh tú déarfaidh sé/sí déarfaimid déarfaidh sibh déarfaidh siad</p> <p>BEIR béarfaidh mé béarfaidh tú béarfaidh sé/sí béarfaimid béarfaidh sibh béarfaidh siad</p> <p>BÍ beidh mé beidh tú beidh sé/sí beimid beidh sibh beidh siad</p>	<p>FAIGH gheobhaidh mé gheobhaidh tú gheobhaidh sé/sí gheobhaimid gheobhaidh sibh gheobhaidh siad</p> <p>FEIC feicfidh mé feicfidh tú feicfidh sé/sí feicimid feicfidh sibh feicfidh siad</p> <p>ITH íosfaidh mé íosfaidh tú íosfaidh sé/sí íosfaimid íosfaidh sibh íosfaidh siad</p>
--	--

<p>CLOIS cloisfidh mé cloisfidh tú cloisfidh sé/sí cloisfimid cloisfidh sibh cloisfidh siad</p> <p>DÉAN déanfaidh mé déanfaidh tú déanfaidh sé/sí déanfaimid déanfaidh sibh déanfaidh siad</p>	<p>TABHAIR tabharfaidh mé tabharfaidh tú tabharfaidh sé/sí tabharfaimid tabharfaidh sibh tabharfaidh siad</p> <p>TAR tiocfaidh mé tiocfaidh tú tiocfaidh sé/sí tiocfaimid tiocfaidh sibh tiocfaidh siad</p> <p>TÉIGH rachaidh mé rachaidh tú rachaidh sé/sí rachaimid rachaidh sibh rachaidh siad</p>
--	--

C.

- Thug an stát gach cúnamh do theaghlach Steve Collins.
- *Tabharfaidh an stát gach cúnamh do theaghlach Steve Collins.*
- Dúirt an tAire Slatter go raibh tacaíocht iomlán ón stát tuillte acu mar gheall ar chomh cróga is a bhí siad.
- *Déarfaidh an tAire Slatter go mbeidh tacaíocht iomlán ón stát tuillte acu mar gheall ar chomh cróga is a bhí siad.*
- Thug gaol le Roy Collins fianaise don chúirt.
- *Tabharfaidh gaol le Roy Collins fianaise don chúirt.*
- Cuireadh go príosún é ar feadh seacht mbliana.
- *Cuirfear go príosún é ar feadh seacht mbliana.*

Ceist 6

Baile Átha Cliath/ Cathair Bhaile Átha Cliath
Béal Feirste/ Cathair Bhéal Feirste
Corcaigh/ Cathair Chorcaí
Gaillimh/ Cathair na Gaillimhe

Eimear Ní Chonaola

Tá sé dearbhaithe ag an Aire Dlí agus Cirt, Alan Shatter, gur thug an stát chuile chúnaimh do theaghlach Steve Collins as Cathair Luimnigh arbh éigean dó athlonnú thar lear mar gheall ar bhagairtí ó bhuíonta coiriúlachta sa gcathair¹. Dúirt an tAire Shatter go raibh tacaíocht iomlán ón stát tuillte acu mar gheall ar chomh cróga is a bhí siad.

Grett O'Connor

Dúnmharaíodh Roy Collins, a bhí cúig bliana is tríocha d'aois, i mí Aibreáin dhá mhíle is a naoi. Cúig bliana roimis² sin lámhachadh col ceathrair leis de bharr gur dhiúltaigh sé cead isteach i dtigh³ tábhairne do dhuine de mhuintir Wayne Dundon, ceannaire ceann de na buíonta is cumhachtaí i Luimneach. Thug gaol le Roy Collins fianaise don chúirt⁴ sa chás sin, gur bhagair Wayne Dundon go maródh sé duine den teaghlach de bharr gur sheas sé ina choinne. Cuireadh go príósún é ar feadh seacht mbliana as ucht an bhagairt⁵ sin a dhéanamh.

Le trí bliana anuas deir Steve Collins, athair Roy Collins, go raibh an teaghlach á bhagairt an t-am ar fad ag baill de bhuíon Wayne Dundon agus go raibh a saol dofhulaingthe dá bharr sin. Tá sé dearbhaithe ag na Gardaí go rabhthas ag obair le beagnach bliain anuas ar phlean chun Steve Collins agus a theaghlach a athlonnú thar lear. Inniu tá an t-athlonnú sin curtha i gcrích, tá tigh tábhairne Steve Collins ceannaithe ag an stát le tiontú ina ionad pobail do dheisceart chathair Luimnigh. Grett O'Connor, Nuacht TG4.

¹ *sa chathair* a mholtar sa chaighdeán

² *roimhe* sa chaighdeán

³ *tigh* a deirtear le haghaidh *teach* i gcanúint na Mumhan

⁴ *don gcúirt* a deirtear

⁵ *an mbagairt* a deirtear